

San Pablo akin itlatitlanil Dios ika okpa okitlajkuiluli non Timoteo

Pablo okitlajkuiluli non Timoteo

1 Nejua, niPablo, niitlatitlanil Jesucristo kue Dios kiyon okinek, uan kiyon niteititis non yankuik nemilistle akin Dios okijto kimmakas inochtin akinomej melauak kineltokaskej Cristo Jesus. ²Timitzijkuilulilia nin amatl, notlasojkone Timoteo. ToTatazin Dios uan toSeñor Jesucristo ma mitzmakakan tlateuechualistle, teiknelilistle uan yolseuilistle.

Ma amikaj pinaua tenojnotzas ika Cristo

³Ijkuak timitzilnamiki ipan notlatzajtzilis, ka youale uan ka tonale, nikasojkamatilia Dios moka, non Dios akin niktekipanoua ika kuali notlalanamikilis kiyon kenime okichikej non iuejka nokoltziuan.

⁴Nikilnamiki kenime otichokaya, uan nikneki timitzitas oksepa uan kiyon uilijki nipakis. ⁵Nikilnamiki titlaneltoka ika kuali moyolo kiyon kenime otlaneltokayaj mokokotzin Loida uan monana Eunice. Nejua kuali nikmati oknoma siyikiyon titlaneltokatika kenime kachto otitlaneltokak.

⁶Iuinon nikneki xiktekipanolti tlenon omitzyektlayokoli Dios ijkuak nejua onikintlali nomauan mopan, uan onotlatzajtzili itlak Dios para ma mitztekpanolti. ⁷Kue Dios otechmakak iEspiritu Santo amo para timojkamikiskej, kue otechmakak para ma tikpiakan poder, ma tikpiakan tlasojtlalistle uan ma tikpiakan kuali toyolilis.

⁸Iuinon, amo xipinaua titenojnotzas ika toSeñor Jesucristo akin por Ijuatl nitzaktika, nian amo xipinaua noka. Kachi kuali xitlajyoui ika non kuali tlajtole non temakixtia. Dios mitzchijchikauas para tikxikos. ⁹Dios otechmakixti, otechchipa uan otechtlapejpeni para ma titekitakan itlak. Amo por otikchikej itlaj kuali, kue Dios kiyon okinek uan otechmakak iteiknelilis imak Cristo Jesus, sta ijkuak ayimo okichijchiuaya inin tlale. ¹⁰Maski axkan Dios yotechititi itlasojtlalis ijkuak ouala non toTemakixtike Jesucristo, akin okitlan non mikistle, uan okipetla non nemilistle inon amo keman tlamis ika non itlajtol non techmakixtia.

¹¹Dios onechtlali ma niteititi nin kuali tlajtole nin temakixtia, onechtlali kenime niitlatitlanil uan onechtlali ma nikimmachti

akinomej amo judiotin. ¹² Uan iuinion nitlajyouia. Maski amo nipinaua, kue nejua kuali nikmati akin imak nitlaneltoka uan akin imak niktlalia notlaneltokilis. Noijke kuali nikmati kipia poder para kimokuitlouis tlenon yoniktlali imak, sta ipan non tonale ijkuak oksepa ualas Cristo.

¹³ Xikimmititi kuali nochi kenime nejua otimitzmachti. Xikimmititi ika motlaneltokilis uan ika motlasojtlalis akin omitzmakak non Cristo Jesus. ¹⁴ Ma mitzpaleui non Espiritu Santo akin nemi totech, xikmalui tlenon Dios omitzmakti.

¹⁵ Tejua itikmati inochtin non tlaneltokakej ipan non tlale Asia onechkajtekej san nosetl. Noijke onechkajtekej non Figelo uan non Hermógenes akin inuan oktayaj. ¹⁶ Non toSeñor ma kimiknelili non ken kimita non Onesiforo, kue ijuatl netlak onechylchikauaya, uan amo opina ijkuak onechitak nitzaktika kampa tetzakuaj uan nijilpitika ika kadena. ¹⁷ Kue, ijkuak ijua oktaya nikan ipan tlaueyikan Roma, onechtemo uan sta kampa onechnexti. ¹⁸ Non toSeñor ma kimikneli ipan non tonale ijkuak ualmokuepas. Tejua noijke kuali tikmati ueyi otechpaleui ipan inon tlaueyikan Éfeso.

Xiye kuali isoldado Jesucristo

2 Tejua, nokone, ximoyolchikaua ika iteuechualis Cristo Jesus uan kiyon sa sekne tiyeskej. ² Tlenon otinechkak onikijto immixpan miyekej tlaneltokakej, inin xikimmachti non tokniuian akinomej melauak motemaktiaj imak Dios, akin kuali kimmachtiskej oksekin.

³ Tejua, kine, moneki xixkiko non tlajyouilistle kenime sente kuali isoldado Jesucristo. ⁴ Non soldado akin nemi ipan guera amo kichijtinemi non tlenon kichijtinemij non oksekin akinomej amo soldadotin. Kue sente soldado moneki kichiuas kiyon kenime kineki non soldado tlanauatike akin okitlali ma ye soldado. ⁵ Noijke, tla ikaj mauiltia, tla amo mauiltia kiyon kenime yomijto mauiltiskej, ayikuali tlatlanis. ⁶ Non akinon tekipanoua uilijki ipan itlatok, itech moneki ijua kachto kikuas non tlenon okitokak. ⁷ Kuali xikkaki tlenon timitzilia, uan toSeñor Jesucristo mitzpaleuis para tikasojkamatis nochi.

⁸ Xikilnamiki mochipa non toSeñor Jesucristo, akin omoskali satepan ijkuak omik uan akin itech ualeua David. Ijua nin kuali tlajtole nin temakixtia nin nejua niteitia. ⁹ Uan por niteitia nin tlamachtile

axkan nitlajyouia itech san tlemach, sta nechtzakuaj kampa tetzajtzakuaj kenime niyeskia amo nikuale. Maski non itlajtlot toTatatzin Dios ayikuali kitzakuaskej. ¹⁰ Iuonon, nikxikoua nochi tlajyouilistle san por akin Dios yokintlapejpeni. Kue nikneki ijuan noijke ma kuali momakixtikan ika Cristo Jesus, para kuali ka yeskej mochipa ipan non ueyi imauistlanes.

¹¹ Axkan, nikneki timitzilis nin tlajtole nin katla ijuua melauak: Tla Iuan yotimikej, noijke Iuan tiyoltaskej.

¹² Tla tikxikoskej titlajyouiskej, noijke kuali titlanauatiskej iuan Cristo.

Tla tikijtoskej amo tikixmatij Cristo, Ijuatl noijke kijtos amo techixmati.

¹³ Tla amo tikchiuaskej tlenon yotikilikej Cristo tikchiuaskej, Ijuatl kichiuas tlenon yokijto, kue Ijuatl ayikuali kipatlas itlajtlot non tlenon yokijto kichiuas.

Non kuali tekipanoke

¹⁴ Xikimmilnamikti non tlaneltokakej nochi inin, uan xikimmili ixpan toSeñor ma amo monanankilikan ipampa itlaj non amitla ipati. Kue amo kuali nankinchiuaj non namechkakij. ¹⁵ Xiknelchiua tikchiuas nochi kuali kue kiyon kipaktis Dios tlenon tikchiua. Moneki tiyes kenime titekkitke inon akinon amo pinaua kue kuali tiktekipanoua inon tlajtole inon melauak. ¹⁶ Amo xikinkaki non tlakaj non teiliaj non tlenon amo melauak uan amitla ipati. Kue nochi inin tlemach nin tlakaj san ika motzinkixtiaj ojkachi imak Dios, uan kachi tlanekpachui itech non tlenon amo kuali. ¹⁷ Non intlamachtitl kimmijtlakoua non tlaneltokakej kenime sente kokole. Siijkiyon omochikej non Himeneo uan non Fileto, ¹⁸ akin okikajkej tlenon melauak uan kijtjouaj yopanok non tonale ijkuak non mimikij moskaliskej. Uan kintlapololtiaj sekin ipan intlaneltokilis. ¹⁹ Maski non itlajtlot Dios non melauak ka kenime sente simiento non amo keman poliuis. Uan itech nin simiento kipia inin tlajtole: “Non toSeñor kimixmati akinomej iuaxkauan.” Uan noijke kijtjoua: “Inochtin akinomej mokuitiaj tlaneltokakej itech Cristo ma amo kichiuakan tlenon Dios amo kipaktia.”

²⁰ Ijtek sente ueyi kale, onkatej san tlemach kuajkualtin tlachijchimej ika oro uan ika plata non patiojkej. Maski noijke onkatej san tlemach

non san ika kuauitl uan san ika sokitl tlachijchimej non amo patiojkej. Non patiojkej kinkuij ijkuak iluichiuaj, uan non amo patiojkej kinkuij mochipa. ²¹ Tla sente tlakatl moyolchipauas para ayikmo kichiuas tlenon amo kuali, non tlakatl yes kenime sente non onka ijtek non kale non kuakuale uan patio. Yes kenime sente non onka ijtek non kale chipauak uan kuali para Dios kitekipanoltis itech itlaj non kachi kuali.

²² Ximotlachili ika nochi tlemach non amo kuali non kinekij kichiuaskej non telpokamej, uan ika nochi moyolo xiknelchiua tikchiuas tlenon kuali, xikpia moyolo non ika titlaneltokas, uan kiyon titetlasojtlas uan tikpias yolseuilistle. Kiyon xikchiua inuan inochtin non toknluan yolchipakej akinomej motlatzajtziiaj imak toSeñor Jesucristo. ²³ Amo ximokalaki inuan non tlakaj akinomej kijtjouaj non amitla ipati uan nian amitla kijtosneki. Kue san ika mokuajkualantiaj.

²⁴ Kue sente itekitke toSeñor amo kuali mokualantijjinemis. Kue, moneki kuali mouikas inuan inochtin, ma kimati kenika temachtis, ma kimati kixikos nochi tlenon kipanos, ²⁵ ma kimati kenika kinnajnouatis akinomej kixpanauiaj, uan kiyon, Dios kinkauilis ma moyolkuepakan para ma kixmatikan tlenon melauak. ²⁶ Uan kiyon kuali kimatiskej kenika momakixtiskej itech imak non moxikuani akin kinchiuilia ma kichiuakan san tlenon ijua kineki.

Kenimejkej yeskej nin tlakaj ijkuak itlantikatej nin tonalmej

3 Noijke moneki tikmatis ijkuak itlantikatej nin tonalmej nin tlakaj panoskej uilijki tlajyouilistle. ² Nin tlakaj la xikolmej yeskej, kuelitaskej melio, san moueyitlaliskej, tetlajtlauikaltiskej, amo kintlakaitaskej intata, ayikmo teasojkamatiskej, amo kitlakaitaskej Dios, ³ ayikmo kimatiskej tetlasojtlaskej nian teikneliskej, ximonatin yeskej, amo kimatiskej tlenon kichijtikatej, amo kualtin tlakaj uan auile kitaskej non tlenon kuali, kikokoliskej nochi tlenon kuali, ⁴ san ichtaka itlaj teatitiskej, amo ixmojkej yeskej, kijtoskej kuali kipiaj inlamachtis, amo kitemoskej Dios, kachi kitemoskej non tlenon ijuan kimpaktia. ⁵ Nesiskej kenime melauak tlaneltokakej, maski kijtoskej amo melauak kipia poder non tlenon kineltokaj.

Amo ximokalaki inuan non tlakaj akinomej kiyon kichiuaj. ⁶ Kue sekin nin tlakaj kalakij techajchan uan kiyon temachtikej tlenon amo melauak. Ika non inlamachtis kinkajkayauaj nin siamej akinomej

amitla kimatij. Nin siuamej kineltokaj kue amo kimatij kichiuskej itlaj tlenon kuali kue tentikatej ika ueyi tlajtlakole uan ika nochi tlemach amo kuali. Ijua nin kinyoltelana non inakayo. ⁷Non siuamej mochipa tlasalotikatej, maski ayikuali kasojkamatij tlenon melauak. ⁸Non tlakaj akinomej kiyon teititij ika tlamachtile amo kuali, kichiuaj noijke siyikiyon kenime non tlatlajmatkej Janes uan Jambres akinomej okinekiyaj kixpanauskej non Moises ika non tlenon okichiuayaj ixpan non rey. Non tlakaj noijke kixpanauiaj tlenon melauak. Kipiaj intlalnamikilis amo kuali uan ayikmo kineltokaj itlajtol Dios. ⁹Maski amo uejka asiskej, kue inochtin kimatiskej nin tlakaj san tlakajkayauaj, kiyon kenime opanokej non omemej non tlatlajmatkej akinomej okinekiyaj kixpanauskej non Moises, kue noijke san otlakajkayauayaj.

Non tlenon okilite Pablo non Timoteo

¹⁰Maski tejua kuali tikualchitiuitz tlenon nejua niteititia uan kenika ninemi. Tikualchitiuitz tlenon nikneki nikchius, tikixmati notlaneltokilis, tikmati kuali niteyolchias ika itlaj, tikixmati notlasojtlalis, tikmati kenika niktekipanoua Dios maski nikijyouis san tlemach, ¹¹tikmati nochi tlenon nipanotiuitz por niteititia itlajtol Dios, kiyon kenime tlenon onipanok ipan non tlaluejueyin Antioquia, Iconio uan Listra, onechtlatlatlalohtikej uan onitlajyouij ueyi. Maski non toSeñor Jesucristo onechmakixti. ¹²Kue melauak, inochtin akinomej kinekiskej nemiskej kuali imak Cristo Jesus, tlajyouiskej kue kintlalatlalochtiskej. ¹³Maski non tlakaj akinomej amo kualtin uan akinomej tlakajkayakej, momostla yeskej ojkachi amo kualtin uan ojkachi tekajkayuaskej, uan oknoma tlakajkayataskej, kue ijuan noijke yokinkajkayakej.

¹⁴Maski tejua ximotzitzkita itech tlenon yomitzmachtikej uan itech tlenon ka ijtek motzontekon. Itikmati melauak tlenon omitzmachtikej, kue noijke tikmati akinomej omitzmachtikej.

¹⁵Xikilnamiki sta ijkuak tipiltontle tikixmati nin Yektlajkuilole, non omitzititi kenika kuali titlaneltokas itlak Cristo Jesus uan kiyon mitzmakixtis. ¹⁶Dios okichi ma kijkuilokan non itlajtol nochi tlenon axkan ijkuilitika itech nin Yektlajkuilole. Uan nochi non itlajtol kuali non ika techmachtis tlenon melauak, non ika techajsokamatilis tlenon amo kuali tikchiuaj, uan kiyon techmelauas, uan techpaleuis kenime

Dios kineki ma tiekan. ¹⁷ Uan kiyon, inochtin non tlaneltokakej itech Dios ma yekan itlaixmatkej para kichiuaskej nochi tlemach kuali.

Xiteititi non itlajtol Dios

4 Ixpan Dios uan ixpan toSeñor Jesucristo, akin kimixkomakas akinomej yoltikatej uan akinomej yomijmikej, ijkuak ualas uan tlanauatis kenime Rey, nejua timitznauatia ² xiteititi non itlajtol Dios. Xikchiua ijkuak kinekiskej mitzkakiskej, uan noijke ijkuak amo kinekiskej mitzkakiskej. Xikinyeknojnotza ika itlajtol Dios ijkuak amo kuali katej, xikimajua ijkuak intech moneki, xikintlajtolmaka ika kuali. Amo keman xikualani inka, kachi kuali xikimmachti ika itlajtol Dios. ³ Kue asis tonale ijkuak nin tlakaj ayikmo kinekiskej kikakiskej non kuali yektlamachtile. Kue, ijuan kikakiskej san tlenon ijuan kimpaktis. Uan motemoliskej miyekej temachtianimej akinomej kimmachtiskej san tlenon ijuan kinekiskej kikakiskej. ⁴ Amo kikakiskej tlenon melauak, kue ijuan kinkakiskej tlajtolmej non amo melauak non san non tlakaj okinejnextikej. ⁵ Maski tejua mochipa xikpia kuali motlalnamikilis, xixkiko nochi nin tlajyouilistle, xiteititi itlajtol Dios, xikchiua nochi nin tekintlakin Dios omitzmakak.

⁶ Kue nejua inechtemaktijtikatej para nechmiktiskej kiyon kine iasitika non tonale ijkuak nimikis. ⁷ Maski nejua oninen kenime sente kuali soldado akin yotlatlan ipan guera, yonitlan nin tekintlakin omonekiya nikchiuaki, uan amo keman onikajka non tlenon onikneltokak. ⁸ Axkan nikchia nechmakaskej nepa tlakpak sente korona kue onikpix noyolilis chipauak. Non toSeñor, akin kijtos akin tlajtlakolyo uan akin amo, Ijuatl nechmakas non korona ipan non ueyi tonale ijkuak oksepa ualas. Uan amo san nejua nechmakas, kue noijke kimmakas inochtin akinomej kichixtikatej ma uala.

Pablo okili non Timoteo ma kitati

⁹ Xiknelchiua tialas san niman tinechitaki. ¹⁰ Kue non Demas yonechkajte uan yoya ipan Tesalónica, kue kachi okipakti inin san tlemach nin onka ipan nin tlele. Crescente yoya ipan estado Galacia, uan Tito oya ipan estado Dalmacia. ¹¹ Sa inin Lucas nouan nemi. Xiktemo non Marcos uan xikkualeka, kue kuali nechpaleuis ipan nin tekintlakin. ¹² Non Tíquico oniktitlan ipan tlaueyikan Éfeso. ¹³ Ijkuak tialas, xinechualikili non nokoton non onikualkajte ompa ipan

tlauyikan Troas ichan non Carpo. Noijke xinechinualikili non nolibrouan, maski kachi xiknelchiua tinechinualikilis non namauan ijuan kachi nikinneki.

¹⁴Non Alejandro, akin teposchiua onechnextili san tlemach amo kuali. Non toSeñor kitlajyouiltis ika non tlenon onechnextili. ¹⁵Tejua ximotlachili ika ijuatl, kue la techkokolia kue amo kipaktia tlenon titemachtikej.

¹⁶Ijkuak kachto onotlajtolpaleui immixpan non tekichikej, amikaj onechpaleui. Inochtin onechkajtekej san nosetl. Ma Dios amo kintlajyouilti por inin. ¹⁷Maski toSeñor onechpaleui uan onechchijchika uan kiyon kuali oniteititi nin kuali tlajtole nin temakixtia uan kiyon ma kikakikan inochtin nin tlakaj akinomej amo judiotin. Kiyon Dios onechmakixti uan amo onechmiktikej.

¹⁸ToSeñor nechmakixtis itech nochi tlenon amo kuali uan nechuiкас napa tlakpak kanin Ijuatl tlanauatia. Dios ma mochipa kiueyitlalikan. Kiyon ma mochiua.

Pablo okinnauati uan okinteuechi non toknluan tlaneltokakej

¹⁹Ompa xikommlajpalo non Prisca uan non Aquila, uan non ken kimita non Onesíforo. ²⁰Non Erasto omoka ipan tlaueyikan Corinto, uan non Trófimo onikualkajte ipan tlaueyikan Mileto mokokoua.

²¹Xiknelchiua tualas ijkuak ayimo peua seua. Mitztlajpalouaj inin Eubulo, Pudente, Lino, Claudia uan inochtin nin toknluan tlaneltokakej.

²²Ma mouan ye toSeñor Jesucristo, uan ma Dios namechteuechiua namonochtin. Kiyon ma mochiua.